

SUMÁRIU KAZU | VIOLÉNSIA BAZEIA BA JÉNERU

Agostu 2014

Intrudusaun

Iha Agostu 2014, Unidade Justisa ba Feto no Labarik (*Women's and Children Justice Unit WCJU*) kontinua monitoriza kazu violénsia bazeia ba jéneru iha jurisdisaun Tribunál Distritál Dili no Tribunál Distritál Baucau. Iha edisaun ne`e, summariza kazu 14 ne`ebé julga iha Tribunál Distritál Dili no Tribunál Distritál Baucau.

Husi kazu 14 ne`e, kazu 12 klasifikadu nu'udar krime ofensa ba integridade física simples ho natureza violénsia doméstika, kazu 1 krime maus tratus ba konjuje, kazu 1 involve krime violasaun seksuál

Entre kazu hirak ne`e, kazu 1 tribunál kondena ho pena prizaun, kazu 7 kondena ho pena prizaun maibé nia ezekusaun suspendidu, kazu 2 absolve, no kazu 4 seluk sei iha prosesu nia laran.

Iha kazu ne`ebé julga ho Nú. Prosesu: 37/2014/TDDIL, ne`ebé krime ho natureze inestu, JSMP hanoin katak instituisaun relevante estadu nian tenke dezenvolve estratejia intervensaun ne`ebé komprensivu atu prevene inestu buras iha sosiedade. Ne`e inklui alterasaun ba provizaun Kódigu Penál aktual no politika kampaña nasional kona-ba impaktu negativu hosi inestu no buka tuir kauza prinsipal hosi inestu atu dezenvolve estratejia intervensaun ne`ebé kontestual no apropiadiu.

Alende ne`e iha kazu ne`ebé julga ho Nú. Prosesu: 166/2014/TDB, JSMP observa katak tribunál la konsistente ho artigu 68 Kódigu Penál tanba aplika pena suspensaun ne`ebé la refleta limitasaun minimu no masimu ne`ebé hatur iha lei. Iha artigu 68 (1) Kódigu Penál define katak tribunál bele suspende pena prizaun aplikada ne`ebé la aas-liu tinan 3 nia ezekusaun durante tinan 1 too tinan 5, hahú iha desizaun nia tránzitu iha julgadu.

JSMP hein katak tribunál sira tenke konsisten ho provizaun sira ne`ebé defini iha lei penál no prosesuál aplicavel no evita inkonsistensia iha práтика.

Tuir mai deskripsiun sumáriu julgamentu ba kazu kompletu:

1. Krime violasaun seksuál - Nú. Prosesu: 37/14.TDDIL

Kompozisaun tribunál	: Juís koletivu
Juís	: Dr. Antonino Gonçalves
Ministériu Públiku	: Dr. Reinato Bere Nahak

Defeza : Dr. Manuel Exposto (defensória pública)
Konkluzaun : Kondena ho pena prizaun

Iha 19 Agostu 2014, Tribunál Distritál Dili prejide leitura akordaun no kondena arguidu ASE ho pena prizaun tinan 12 tanba provadu komete krime violasaun seksuál hasoru nia subriña, iha Distritu Ermera. Tribunál mós imediatamente aplika prizaun preventiva ba arguidu hodi hein desizaun tranzitu iha julgadu no wainhira iha rekursu ba desizaun ba primeira instansia.

Tribunál prova katak arguidu komete krime ne'e dala-tolu durante tinan 2008 nia laran. Arguidu nia asaun hasoru lezada ho forma hanesan kesi lezada nia liman ho ain ba kama, kolu tiha lezada nia ropa no halo relasaun seksuál ho lezada. Tribunál prova katak arguidu halo relasaun seksuál hasoru lezada seidauk iha idade tinan 17.

Tuir mai iha tinan 2009, arguidu kontinua halo relasaun seksuál dala rua hasoru lezada, iha lokraik, bainhira lezada nia inan-aman la hela iha uma.

Tribunál konsidera faktus hotu-hotu provadu bazeia ba konfisaun arguidu, depoimentu lezada no dokumentus iha autus laran.

Ministériu Públiku akuza arguidu kontra artigu 287 Kódigu Penál Indonézia kona-bá hala'o relasaun seksuál ho ema ne'ebé seidauk iha tinan 15.

Depoisde produsaun ba prova, tribunál altera kualifikasiun juridika hosi artigu 287 ba artigu 285 Kódigu Penál Indonesia kona-ba krime violasaun seksuál no artigu 172 Kódigu Penál Timor-Leste kona-bá krime violasaun no agravasaun tuir artigu 173 letra (d) Kódigu Penál Timor Leste.

Depoisde avalai faktus sira ne'ebé mak produs durante julgamentu, tribunál prova katak arguidu práтика krime dala lima hasoru lezada.

Bazeia ba faktu sira ne'e, tribunál konklui prosesu ne'e no kondena arguidu ho pena prizaun tinan 12 tuir artigu 285 Kódigu Penál Indonézia, tanba konsidera katak provizaun Kódigu Penál Indonézia nian favorese liu ba arguidu, tuir Artigu 3 (3) Kódigu Penál Timor-Leste kona-ba lei penal nia aplikasaun iha tempu.

Tuir Kódigu Penál Timor Leste kumulasaun pena prizaun sei konklui ho pena prizaun tinan 14, enkuantu tuir Kódigu Penál Indonézia sei konklui ho pena prizaun tinan 12. Tanba ne'e, tribunál aplika pena únika tinan 12 prizaun.

Tribunál la kondena arguidu atu selu indemnizasaun sivíl maibé deklara katak indemnizasaun ne'e depende ba konxiensia familia atu resolve tuir tradisaun familia nian.

2. Krime maus tratus ba kónjuje - Nú. Prosesu: 175/14.TDDIL

Kompozisaun tribunál : Juis koletivu

Juis	: Dr. Antonino Gonçalves
	Dra. Fancisca Cabral
	Dra. Jumiaty Freitas
Ministériu Públiku	: Dr. Reinato Bere Nahak
Defeza	: Dr. Câncio Xavier (defensória públika)
Konkluzaun	: Sei kontinua prosesu

Iha 21 Agostu 2014, Tribunál Distritál Dili julga arguidu JA ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 22 Dezembru 2013, arguidu basa dala rua iha lezada nia hasan, no tebe dala rua iha lezada nia kelen Kazu ne'e akontese tanba arguidu deskofia lezada ba mane seluk.

Iha 2 Fevereiru 2014, arguidu hanehan lezada nia isin ba iha rai no basa dala rua iha hasan. Aktu ne'e rezulta lezada sofre moras iha hasan, kelen no isin lolon tomak.

Ministériu Públiku akuza arguidu kontra artigu 154 Kódigu Penál kona-ba krime maus tratus ba kónjuje.

Iha tribunál, arguidu deklara katak basa deit lezada, la tebe no la hanehan lezada ba rai, arepende nia hahalok no di'ak malu ona ho lezada.

Iha parte seluk, lezada depoimenta katak arguidu halo duni agresaun fízika hasoru nia, tuir akuzasaun ministériu públiku nian, maibé agora sira diak malu ona. Lezada rasik perdura ona arguidu nia hahalok ne'e.

Iha alegasaun finál, ministériu públiku mantein ho ninia akuzasaun no husu ba tribunál atu kondena arguidu tuir krime ne`ebé arguidu komete.

Defeza husu ba tribunál atu konsidera arguidu nia deklarasaun katak nia basa deit lezada, la tebe no hanehan ba rai, arepende no kontinua responsabilidade ba nia familia, tanba ne'e husu pena ne`ebé kaman.

Depoisde rona tiha alegasaun husi parte sira, tribunál marka fali agenda julgamentu ba leitura sentensa iha 9 Setembru 2014 iha tuku 17:00 lorakraik.

3. Krime ofensa ba integridade fízika simples ho natureza violénsia doméstika - Nú. Prosesu: 220/14.TDDIL

Kompozisaun tribunál : Juis singular

Juis	: Dra. Jacinta Correia da Costa
Ministériu Públiku	: Dra. Ivonia Maria Guterres
Defeza	: Dr. Marcal Mascarenhas (defensória pública)
Konkluzaun	: Sei kontinua prosesu

Iha 25 Agostu 2014, Tribunál Distritál Dili julga arguidu MSC ne`ebé komete krime violénsia doméstika hasoru nia feen, iha Distritu Liquisa.

Ministériu Públiku akuza katak iha 27 Janeiru 2014, laiha motivu ne`ebé klaru, arguidu rasta lezada nia fuk, basa dala rua iha hasan, hanehan ba kama no duni-sai husi uma. Aktu ne`e resulta moras iha lezada nia hasan no ulun.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 3 no 35 Lei Kontra Violénsia Daméstika.

Iha tribunál, arguidu rejeita akuzasaun katak nia la basa, la hanehan ba kama no la duni-sai lezada sai husi uma. Arguidu deklara katak rasta deit lezada nia fuk tanba antes ne`e arguidu fanu lezada atu hader nono-be hodi fo haris bebe, maibé lezada lakohi. Tanba ne`e arguidu nervozu hodi rasta lezada nia fuk, arguidu mós deklara katak arepende ona ba nia hahalok ne`e.

Lezada depoimenta katak arguidu rakut, basa, hanehan ba kama no duni lezada sai husi uma. Aleinde ne`e, lezada reforsa liu-tan katak arguidu ameasa bebeik ona katak atu oho mate lezada. Agora dadaun hela iha iha uma mahon ida iha Dili no deside atu fahe-malu ho arguidu.

Iha alegasaun finál, ministériu públiku konsidera faktu hotu-hotu provadu tuir konfisaun parsial husi arguidu no depoimentu konfirmasaun hosi lezada nian, husu ba tribunál kondena arguidu ho pena prizaun tinan 1 suspende ba tinan 2.

Iha defeza alegasaun no pedidu haktuir katak akuzasaun ministériu públiku la prova tanba deklarasaun arguidu kontrariu ho depoimentu lezada nomos laiha testamuña. Tanba ne`e, husu ba tribunál atu fo kastigu ne`ebé kmaan.

Depoisde rona tiha alegasaun husi parte sira, tribunál marka fali agenda julgamentu ba leitura sentesa iha 1 Setembru 2014 iha tuku 17:00 loraik.

4. Krime ofensa ba integridade física simples ho natureza violénsia doméstika - Nú. Prosesu: 285/14.TDDIL

Kompozisaun tribunál	: Juis singular
Juis	: Dra. Jacinta Correia da Costa
Ministériu Públiku	: Dr. Felismino Cardoso

Defeza : Dr. José da Silva (defensória pública)
Konkluzaun : Sei kontinua prosesu

Iha 26 Agostu 2014, Tribunál Distritál Dili julga arguidu MX ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 20 Novembru 2012, lezada fila husi sosa modo sein motivu ne`ebé klaru, arguidu husi kotuk buti lezada nia kakorok no kauza lezada sente moras iha nia kakorok. Iha kalan arguidu basa dala ida iha lezada nia matan laran no tebe iha ain too lezada monu tama iha mota laran no ain kanek.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples kónjuga ho artigu 35 Lei Kontra Violénsia Doméstika.

Iha julgamento arguidu konfesa integralmete ba faktus iha akuzasaun no deklara katak nia arepende nia hahalok. Arguidu mós deklara katak problema ne`e akontese iha momentu sira sei namora no kazu ne`e hetan ona desizaun husi tribunál.

Alende ne`e, lezada mós rekonfirma katak problema ne`e akontese iha momentu sira sei namora no hetan ona desizaun husi tribunál iha tinan kotuk.

Mezmu iha deklarasaun husi arguidu ho lezada katak kazu ne`e hetan ona desizaun husi tribunál iha tinan kotuk, maibé tribunál iha akuzasaun rua ho data akontesementu ne`ebé diferente. Akontesementu primeiru iha 20 Novembru 2012 kazu ne`e hetan ona desizaun. Kazu ne`ebé mak julga h akontese iha 20 Marsu 2013, tanba ne`e tribunál deside kontinua halo julgamento.

Depois rona tiha deklarasaun hosi arguidu no lezada, tribunál marka fali agenda julgamento ba alegasaun final iha 9 Setembru 2014 iha tuku 16:00 loraik.

5. Krime ofensa ba integridade fízika simples ho natureza violénsia doméstika - Nú. Prosesu: 432/14.TDDIL

Kompozisaun tribunál : Juis singular
Juis : Dra. Francisca Cabral
Ministériu Públiku : Dra. Ivonia Maria Guterres
Defeza : Dr. Câncio Xavier (defensória pública)
Konkluzaun : Kondenho pena prizaun tinan 1 suspende ba tinan 2

Iha 5 Setembru 2014 Tribunál Distritál Dili julga arguidu AA ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 27 Fevereiru 2014, arguidu tuku dala rua iha lezada nia rentos no dala rua iha kanuruk. Kazu ne'e akontese tanba arguidu husu osan ba lezada atu fo ba nia kolega empresta maibé lezada dehan osan laiha. Arguidu nervozu tama ba kuartu laran sobu armari no soe sai hotu ropa iha armari laran. Aktu ne'e rezulta bubu no moras iha lezada nia rentos no kanuruk.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 2, 3 no 35 Lei Kontra Violénsia Doméstika.

Iha tribunál, arguidu konfesa no deklara katak faktus iha akuzasaun ne'e loos hotu, arepende ba nia hahalok no diak malu ona ho lezada. Tanba ne'e tribunál presindi (la presiza rona) deklarasaun lezada tanba arguidu konfesa.

Iha alegasaun finál, ministériu públiku haktuir katak sirkunstánsia ne`ebé atenua (hakman) mak tanba arguidu konfesa, manifesta arependementu, primeiraves komete krime no diak malu ona ho lezada. Maibé atu halo prevensaun ba krime hanesan labele akontese tan iha futuru, ministériu públiku husu ba tribunál atu kondena arguidu ho pena prizaun fulan 6 suspende ba tinan 1.

Iha defeza nia konkluzaun haktuir katak arguidu konfesa, arepende nia hahalok, primeiraves komete krime, diak malu ona ho lezada, tanba ne`e husu ba tribunál atu kondena arguidu ho pena prizaun fulan 6 suspende ba fulan 6.

Depoisde avalia faktus provadus sira ne`ebé mak produz durante julgamentu, tribunál konsidera arguidu provadu komete krime hasoru lezada, tanba ne`e tribunál konklui hodi kondena arguidu ho pena prizaun tinan 1 suspende ba tinan 2 no selu mós kusta judisiariu US\$20.

6. Krime ofensa ba integridade fízika simples ho natureza violénsia doméstika - Nú. Prosesu: 0209/2013/TDB.

Kompozisaun tribunál	: Juis singular
Juis	: Dr. Antonio Fonseca
Ministériu Públiku	: Dr. Luis Hernani Rangel da Cruz
Defeza	: Dr. Grigorio de Lima (defensória públika)
Konkluzasaun	: Kondena ho pena prizaun fulan 4 suspende ba tinan 1

Iha 25 Agosto 2014, liu husi julgamentu movél Tribunál Distritál Baucau julga kazu violénsia doméstika ne`ebé komete husi arguidu DLHS hasoru nia feen, iha Distritu Manatuto.

Ministériu Públiku akuza katak 17 Abril 2013, arguida tuku dala ida iha lezada nia kabas, tebe dala ida iha kidan no basa dala ida iha lezada nia hasan. Aktu hirak ne'e kauza bubu no moras

iha kabas, kidan no hasan. Kazu ne'e akontese tanba arguidu no lezada haksesuk malu kona-ba kafe ne'ebé lezada prepara ba arguidu fila husi tos atu hemu, maibé labarik fakar tiha.

Ministériu Públiku akuza arguida kontra artigu 145 Kódigu Penál kona-ba ofensa ba integridade fizika simples, konjuga ho artigu 2 alinea (a), 3 alinea (a) no 35 alinea (b), Lei Kontra Violénsia Doméstika.

Iha tribunál, arguidu deklara ba tribunál katak faktus sira iha akuzasaun ne'e los hotu. Maibe arguidu mós deklara katak depois akontesementu liu tia loron ida sira dame malu kedas.

Tanba arguidu rasik confesa integralmente ba faktus hotu ne'ebé mak konsta iha akuzasaun, Ministériu Públiku deside hodi presinde tiha lezada ho testamuña.

Iha alegasaun finál, ministériu públiku hare ba sirkunstansia atenuante balu mak hanesan arguidu primeira-ves komete krime no arepende nia hahalok. Tanba ne'e husu ba tribunál atu aplika pena prizaun fulan 6 suspende ba tinan 1. Arguidu ema agrikultor no laiha kbit ekonomia atu selu multa, tanba ne'e husu atu aplika pena prizaun maibe suspende.

Defeza konfirma katak hare ba faktu hotu provadus, arguidu foin primeiraves komete krime, arepende nia hahalok, tanba ne'e husu ba tribunál atu aplika pena ne'ebé mak adekuadu ba arguidu.

Depoisde avalia faktus provadus sira ne'ebé mak produz durante julgamentu, tribunál konklui prosesu ne'e hodi kondena arguidu ho pena prizaun fulan 4 suspende ba tinan 1.

7. Krime ofensa ba integridade fizika simples ho natureza violénsia doméstika - Nú. Prosesu: 0169/2012/TDB

Kompozisaun tribunál	: Juis singular
Juis	: Dr. Antonio Fonseca
Ministériu Públiku	: Dr. Luis Hernani Rangel da Cruz
Defeza	: Dr. Grigorio de Lima (defensória públika)
Konkluzasaun	: Kondena ho pena prizaun fulan 4 suspende ba tinan 1

Iha 25 Agosto 2014, Tribunál Distritál Baucau liu husi julgamentu movel iha Distritu Manatuto, julga arguidu JMDS ne`ebé komete krime violénsia doméstika hasoru nia feen, iha Distritu Manatuto.

Ministériu Públiku akuza katak iha 28 Marsu 2012, arguidu tuku dala ida iha lezada nia matan fukun no basa dala ida iha hasan no kauza lezada hetan bubu no moras. Kazu ne'e akontese

tanba wainhira sira han kalan, hahan nesik arguidu depois arguidu haruka lezada atu ba fui be'e maibe lezada kolia fali buat seluk hodi provoka arguidu nervoju.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples, konjuga ho artigu 3, 35 Lei Kontra Violénsia Doméstika.

Iha tribunál, arguidu konfesa integralmente ba faktus iha akuzasaun no arepende ba nia hahalok. Arguidu mós deklara ba tribunál katak depoisde akontesimentu sira iha ona akordu dame mak hanesan arguidu fo tais feto ida, bibi aman ida no hena metro 2. Aleinda ne'e lezada mós fo fali tais mane ida no osan US\$. 20

Tribunál konfirma ba lezada kona-bá akordu dame ne'e lezada deklara ba tribunál katak sira dame malu ona no agora sira hela hamutuk fali ona. Hare ba faktus hotu provadus tribunál presinde atu la rona deklarasaun husi testamuña.

Iha alegasaun finál, ministériu públiku hare katak faktus hotu provadus no arguidu arepende nia hahalok, tanba ne'e husu ba tribunál atu aplika pena multa ba arguidu.

Defeza konklui katak arguidu foin primeiraves komete krime, arepende nia hahalok no konfirmasaun hosi lezada katak los duni sira dame malu ona. Tanba ne'e husu ba tribunál atu aplika pena ne'ebé mais adekuadu ba arguidu.

Depoisde avalia faktus provadus sira ne`ebé produz durante julgamentu, tribunál konklui prosesu ne`e hodi kondena arguidu ho pena perizaun fulan 4 suspende ba tinan 1.

8. Krime ofensa ba integridade fizika simples ho natureza violénsia doméstika - Nú. Prosesu : 0530/2013/TDB

Kompozisaun Tribunál	: Juis singular
Juis	: Dr. Antonio Fonseca
Ministériu Públiku	: Dr. Luis Hernani Rangel da Cruz
Defeza	: Dr. Grigorio de Lima (defensória públika)
Konkluzasaun	: Kondena ho pena prizaun fulan 5 suspende ba tinan 1

Iha 26 Agostu 2014, Tribunál Distritál Baucau liu husi julgamentu movel iha Distritu Manatuto, julga arguidu DDS ne`ebé komete krime violénsia doméstika hasoru nia aman, iha Distritu Manatuto.

Ministériu Públiku akuza katak iha 05 Novembru 2013, arguidu lori kadeira masa baku iha lezadu nia ain- tuur no kabas ne`ebé kauza moras no bubu iha lezadu nia isin-lolon. Kazu ne'e akontese tanba la intendemalu iha diskusaun kona-bá bee.

Ministériu Públiku akuza arguidu kontra artigu 145 Kódigu Penál kona-bá ofensa ba integridade fizika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente ba faktus hotu ne'ebé mak konsta iha akuzasaun. Arguidu mós deklara ba tribunál katak sei la komete tan krime hanesan hasoru lezada iha futuru. Tuir deklarasaun lezadu nian katak sira diak malu ona no iha loron 31 Dezembru 2013 sira dame malu ona no to agora arguidu la komete tan krime hanesan hasoru lezadu.

Iha alegasaun finál, ministériu públiku hare katak arguidu konfesa integralmente ba faktus hotu ne'ebé mak konsta iha akuzasaun, arepende nia hahalok. Tanba ne'e husu ba tribunál atu aplika pena prizaun fulan 6 suspende ba tinan 1.

Defeza konklui katak arguidu konfesa ba faktus hotu, arepende ba nia hahalok tanba ne'e husu ba tribunál atu aplika pena ne'ebé mak adekuadu ba arguidu.

Depoisde avalia faktus provadus sira ne`ebé mak produz durante julgamentu, tribunál konklui prosesu ne'e hodi kondena arguidu ho pena prizaun fulan 5 suspende ba tinan 1.

9. Krime ofensa ba integridade física simples ho natureza violénsia doméstika Nú. Prosesu: 0092/2013/TDB.

Kompozisaun Tribunál	: Juis singular
Juis	: Dr. Antonio Fonseca
Ministériu Públiku	: Dr. Luis Hernani Rangel da Cruz
Defeza	: Dr. Grigorio de Lima
Konkluzasaun	: Sei kontinua prosesu

Iha 26 Agostu 2014, Tribunál Distritál Baucau liu husi julgamentu movel iha Distritu Manatuto, julga arguidu MA ne`ebé komete krime violénsia doméstika hasoru nia feen, iha Distritu Manatuto.

Ministériu Públiku akuza katak iha 17 Janeiru 2013, arguidu tuku iha lezada nia ibun, ulun no matan fukun. Aktu ne'e rezulta lezada sofre moras no bubu iha nia ibun, matan fukun no ulun. Kazu ne'e akontese tanba arguidu no lezada la intende malu kona-bá arguidu nia moras.

Ministériu Públiku akuza arguidu kontra artigu 145 Kódigu Penál kona-bá krime ofensa ba integridade fizika simples, konjuga ho artigu 3 no 35 Lei Kontra Violénsia Doméstika.

Iha tribunál, arguidu deklara integralmente ba faktus husi akuzasaun no promete sei la komete tan krime hasoru lezada iha futuru.

Aleinde ne'e lezada kontinua reforsa faktu sira iha akuzasaun. Maske nune'e, lezada mós deklara faktu seluk tan katak, iha 22 Juñu 2014, arguidu mós basa lezada nia hasan los tanba fanun arguidu atu ba sosa dosi hodi lori ba ema sira ne'ebé koa hela hare iha sira nia natar.

Relasiona ho faktu foun ne'e, bazeia ba artigu 273 Kódigu Prosesu Penál kona-bá alterasaun la-substansiál ba faktu iha akuzasaun, ministériu públiku husu ba tribunál atu halo alterasaun ba artigu 145 ba fali artigu 154 Kódigu Penál kona-bá maus tratus ba kónjuje.

Bazeia ba alterasaun ne'e, ministériu públiku husu ba tribunál atu aplika pena prizaun tinan 2 suspende ba tinan 3, atu asegura katak arguidu la repete tan krime hanesan iha futuru.

Defeza husu ba tribunál atu konsidera sirkunstansia atenuante arguidu nian hanesan foin primeira-ves komete krime, konfesa faktus no dame malu ona ho lezada, nune'e husu ba tribunál atu aplika pena ne'ebé mak adekuadu ba arguidu.

Depoisde rona tiha alegasaun husi parte sira, tribunál konsidera faktus foun ne'ebé produs durante julgamento, juis ne'ebé prejide julgementu konsiente katak tribunál singular laiha kompetensia atu foti desizaun tuir artigu 14 Kódigu Prosesu Penál, kona-bá tribunál koletivu nia kompetensia. Tanba ne'e, leitura akordaun sei hato'o ho kompozisaun juis kolektivu, iha 03 Setembru 2014, iha tribunál distritál Baucau, iha tuku 14.00.

10. Krime ofensa ba integridade fízika simples ho natureza violénsia doméstika - Nú. Prosesu: 0047/2013/TDB.

Kompozisaun	: Juis singular
Juis	: Dr. Antonio Fonseca
Ministériu Públiku	: Dr. Luis Hernani Rangel da Cruz
Defeza	: Dr. Grigoriu de Lima (defensória públika)
Konkluzasaun	: Kondena ho pena prizaun fulan 6 suspende ba tinan 1.

Iha 27 Agosto 2014, Tribunál Distritál Baucau liu husi tribunál movel iha Distritu Manatuto, julga arguidu MA ne'ebé komete krime violénsia doméstika hasoru nia feen, iha Distritu Manatuto.

Ministériu públiku akuza katak iha 11 Januari 2013, arguidu tebe dala ida iha lezada nia kotuk laran, tuku dala barak iha ulun, oin no matan fukun. Agresaun hirak ne'e kauza lezada sofre moras no bubu iha fatin sira ne'ebé arguidu halo ofensa ba. Kazu ne'e akontese arguidu no lezada haksesuk malu kona-bá sasan uma laran.

Ministériu Públiku akuza arguidu kontra artigu 145 Kódigu Penál kona-bá ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente ba faktus iha akuzasaun no deklara katak nia arepende nia hahalok. Maske nune'e, tribunál kontinua konfirma ba lezada no lezada deklara katak arguidu halo duni hahalok refere hasoru lezada.

Iha alegasaun finál, ministériu públiku hare katak faktus hotu ne'ebé mak konsta iha akuzasaun provadu hotu. Maibe tana arguidu hatudu arependementu, foin primeira ves komete krime, husu ba tribunál atu aplika pena prizaun fulan 6 suspende ba tinan 1.

Defeza argumenta katak arguidu foin primeira ves komete krime, arepende nia hahalok, tanba ne`e husu ba tribunál atu aplika pena ne'ebé mak adekuadu ba arguidu.

Depoisde avalia faktus provadus sira ne`ebé mak produz durante julgamentu tribunál konklui prosesu ne`e no kondena arguidu ho pena prizaun fulan 6 suspende ba tinan 1.

11. Krime ofensa ba integridade fízika simples ho natureza violénsia doméstika - Nú. Prosesu: 0220/2011/TDB.

Kompozisaun Tribunál	: Juis singular
Juis	: Dr. Antonio Fonseca
Ministériu Públiku	: Dr. Luis Hernani Rangel da Cruz
Defeza	: Dr. Grigoriu de Lima (defensória pública)
Konkluzasaun	: Kondena ho pena prizaun fulan 6 suspende ba tinan 1.

Iha 27 Agosto 2014, Tribunál Distritál Baucau liu husi tribunál movei iha Distritu Manatuto julga arguidu BS ne`ebé komete krime violénsia doméstika hasoru nia feen, iha Distritu Manatuto.

Ministériu Públiku akuza katak iha 17 Marsu 2011, arguidu basa dala ida lezada nia hasan, tebe dala rua iha kabun kidun no tuku dala ida iha kotuk laran no kauza lezada sofre moras iha kabun kidun no kotuk laran.

Kazu ne'e akontese tanba arguidu lasatisfas wainhira rona lezada haruka arguidu nia alin feto ses tia husi kama laran hodi lezada atu hato-ba sira nia oan ida ki'ik.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 3, 35 Lei Kontra Violénsia Doméstica.

Iha tribunál, arguidu deklara katak faktus iha akuzasaun ne'e los hotu, arepende nia hahalok no promete sei la komete tan krime refere hasoru lezada iha futuru. Wainhira tribunál konfirma ba lezada relasiona ho faktu sira ne'e no konfisaun arguidu nian, lezada reforsa tan katak sira dame malu ona.

Iha alegasaun finál, ministériu públiku konsidera faktus hotu-hotu provadu tuir konfisaun arguidu nian. Maske nune'e atu prevene krime violénsia doméstika labele akontese tan iha future, husu ba tribunál atu aplika pena prizaun fulan 6 suspende ba tinan 1.

Defeza konfirma katak hare ba sirkunstansia atenuante balu hanesan sira diak malu ona, arguidu mós arepende ba nia hahalok, tanba ne'e husu ba tribunál atu aplika pena ne'ebé adekuadu ba arguidu.

Depoisde avalia faktus provadus sira ne`ebé mak produz durante julgamentu, tribunál konklui prosesu ne`e hodi kondena arguidu ho pena prizaun fulan 6 suspende ba tinan 1.

12. Krime ofensa ba integridade fízika simples ho natureza violénsia doméstika - Nú. Prosesu: 0093/2012/TDB.

Kompozisaun Tribunál	: Juis singular
Juis	: Dr. Antonio Fonseca
Ministériu Públiku	: Dr. Luis Hernani Rangel da Cruz
Defeza	: Dr. Grigoriu de Lima (defensória pública)
Konkluzasaun	: Absolve

Iha 27 Agusto 2011, Tribunál Distritál Baucau liu husi tribunál movei iha Distritu Manatuto, julga arguidu MSRP ne`ebé komete krime violénsia doméstika hasoru nia feen, iha Distritu Manatuto.

Ministériu Públiku akuza katak iha 12 Fevereiru 2012, arguidu lori ai baku iha lezada nia liman karuk, hirus matan no basa iha kabaas no kauza lezada lakon konsensia no monu tun ba rai.

Kazu ne'e akontese tanba wainhira lezada ba bolu sira nia tiu atu mai hare karau tama toos. Wainhira too iha dalan klaran lezada hasoru arguidu ho kondisaun lanu no husu ba lezada ba ne'ebé no sein justifikasiarguidu baku lezada.

Ministériu Públiku akuza arguidu kontra artigu 145 Kódigu Penál kona-bá ofensa ba integridade fízika simples, konjuga ho artigu 3, 35 Lei Kontra Violénsia Doméstika.

Iha tribunál, arguidu deklara katak faktus hotu iha akuzasaun los no arguidu mós dekalra katak arepende ba nia hahalok.

Iha alegasaun finál, ministériu públiku hare katak faktus hotu ne'ebé konsta iha akuzasaun provadu hotu, arguidu arepende no foin primeiraves komete krime. Tanba ne'e husu ba tribunál atu aplika pena prizaun tinan 1 suspende ba tinan 1 fulan 6.

Defeza konfirma katak arguidu foin primeira ves komete krime, arepende ba nia hahalok, tanba ne'e husu ba tribunál atu aplika pena ne'ebé adekuadu ba arguidu.

Depoisde avalia faktus provadus sira ne`ebé mak produz durante julgamentu, tribunál konklui prosesu ne`e no kondena arguidu ho pena prizaun fulan 8 suspende ba tinan 1

13. Krime ofensa ba integridade fízika simples ho natureza violénsia doméstika Nú. 166/2014/TDB

Kompozisaun Tribunál : Juis singular
Juis : Dr. Antonio Fonseca
Ministériu Públiku : Dr. Luis Hernani Rangel da Cruz
Defeza : Dr. Grigoriu de Lima (defensória pública)
Konkluzasaun : Kondena ho pena prizaun fulan 2 suspende ba fulan 6.

Iha 27 Agosto 2014, Tribunál Distritál Baucau liu husi tribunál movei iha Distritu Manatuto julga arguida LS ne`ebé komete krime violénsia doméstika hasoru nia laen iha Distritu Manatuto. Julgamentu ne`e kontinua kedas ba leitura desizaun.

Ministériu Públiku akuza katak iha 26 Abril 2013, arguida rakut dala ida iha lezadu nia kakorok no lori ai- pedasuk ida tuda kona iha lezadu nia kanuruk ne`ebé kauza nakles iha kakorok. Kazu ne`e akontese tanba sira haksesuk malu kona-bá uzu kustumi uluk nian.

Ministériu Públiku akuza arguida kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguida deklara katak faktus sira ne`ebé mak konsta iha akuzasaun los hotu, no promete sei la komete tan krime hanesan hasoru lezadu iha futuru.

Iha alegasaun finál, ministériu públiku hare katak arguida konfesa integralmente ba faktus hotu ne`ebé mak konsta iha akuzasaun, tanba ne`e husu ba tribunál atu aplika pena prizaun fulan 4 suspende ba tinan 1.

Iha parte seluk defeza hare katak arguida foin primeira-ves komete krime, arepende nia hahalok, tanba ne`e, husu ba tribunál atu aplika pena ne`ebé adekuadu ba arguida.

Depoisde avalia faktus provadus sira ne`ebé mak produz durante julgmentu, tribunál konklui prosesu ne`e hodi kondena arguida ho pena prizaun fulan 2 suspende ba fulan 6.

14. Krime ofensa ba integridade fízika simples ho natureza violénsia doméstika Nú. Prosesu: 110/2013/TDB.

Kompozisaun Tribunál : Juis singular
Juis : Dr. Antonio Fonseca
Ministériu Públiku : Dr. Luis Hernani Rangel da Cruz
Defeza : Dr. Grogoriu de Lima (defensória pública)

Konkluzasaun : Absolve

Iha 28 Agosto 2011, Tribunál Distritál Baucau liu husi tribunál movei iha Distritu Manatuto julga arguidu DS ne`ebé komete krime violénsia doméstika hasoru nia feen, iha Distritu Manatuto.

Ministériu Públiku akuza katak iha 24 Agosto 2011, arguidu tebe dala ida iha lezada nia kotuk laran no kauza lezada sofremoras. Aktu ne'e akontese tanba parte rua haksesuk malu no la intende malu kona-bá arguidu nia moras.

Ministériu Públiku akuza arguidu kontra artigu 145 Kódigu Penál kona-bá ofensa ba integridade fizika simples, konjuga ho artigu 35 Lei Kontra Violénsia Doméstika.

Iha tribunál, arguidu deklara katak faktus sira iha akuzasaun loos hotu, no arepende nia hahalok. Tanba arguidu konfesa tribunál deside atu la rona tan depoimentu husi lezada.

Iha alegasaun finál, ministériu públiku hare katak faktus hotu ne`ebé mak konsta iha akuzasaun provadu hotu, arguidu arepende nia hahalok, foin primeiraves komete krime, tanba ne'e, husu ba tribunál atu aplika pena prizaun fulan 6 suspende ba tinan 1

Defeza confirma katak arguidu hatudu nia arependimentu, foin primeira ves komete krime, tanba ne`e husu ba tribunál atu aplika pena ne`ebé mak adekuadu ba arguidu.

Depoisde avalia faktus provadus sira ne`ebé mak produz durante julgamento, tribunál konklui prosesu ne`e hodi kondena arguidu ho pena prizaun fulan 6 suspende ba tinan 1.

Atu hetan informasaun kle'an favor kontaktu direitamente:

Luis de Oliveira Sampaio

Diretor Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883|77295795 Website: www.jsmp.tl

Facebook: www.facebook.com/timorleste.jsmp

Twitter: @JSMPtl